

Ekonomski fakultet Brčko na Sajmu zapošljavanja i obrazovanja

10.05.2019. godine, u Omladinskom centru Brčko, u okviru projekta „Program karijernog savjetovanja i usmjeravanja“, održan je drugi po redu Sajam zapošljavanja i obrazovanja, organizovan od strane Zavoda za zapošljavanje BDBiH, u saradnji sa Vladom BDBiH i Omladinskim centrom „Vermont“ Brčko.

Na ovom sajmu privrednici i poslodavci imaju priliku da promovišu svoja preduzeća, te da predstave načine zapošljavanja, potrebu za novim radnim mjestima i traženim zanimanjima, te da na taj način privuku novu radnu snagu. Isto tako, šest firmi je imalo priliku da predstavi program za samozapošljavanje, a učenici, budući studenti i radnici su mogli da steknu bolji pogled prilika za obrazovanje i zapošljavanje u Brčko distriktu BiH.



Profesori i studenti Ekonomskog fakulteta Brčko su iskoristili ovu priliku da promovišu naš Fakultet srednjoškolicima i drugim mladim ljudima koji su posjetili Sajam. Zapaženo izlaganje na panel diskusiji, pored potpredsjednika privredne komore BDBiH, šefa odjeljenja za privredni razvoj, sport i kulturu u Vladi BDBiH, predstavnika Zavoda za zapošljavanje BDBiH i predstavnika pododjeljenja za srednje obrazovanje, imao je i Dekan Ekonomskog fakulteta Brčko, Prof. dr Srđan Lalić, koji je istakao aktivnosti na koje je Fakultet izuzetno ponosan, od saradnje sa Addiko bankom, Bosnaplodom, Bimalom, Centralnom bankom, gdje je našim studentima omogućeno obavljanje ferijalne prakse, do razmjene naših studenata na prestižnim fakultetima u Haenu, Španija i Voronježu, Rusija, osnivanju centra za naučno - istraživački rad, te učešću u organizaciji Biznis foruma i Sajma privrede BDBiH. Akcenat je bio na aktivnoj saradnji Fakulteta sa Vladom BDBiH, Zavodom za zapošljavanje i Privrednom komorom

BDBiH. Istaknut je značaj povezivanja svih segmenata na tržištu rada, prije svega poslodavaca i nezaposlenih lica sa jedne strane, te obrazovnih institucija i budućih radnika sa druge strane, te da se informacije, odnosno zahtjevi poslodavaca prosljede institucijama obrazovanja i Vladi, kako bi sam sistem obrazovanja bio kreiran na način da učenici i studenti koji budu izlazili iz školstva budu spremni za tržište rada.

